



040-4614

丁巳上座請大藏及
家書置之武州紫雲山
我微笑學院直房中求
為學者不敢許出院內
當山三世鐵牛機詳記



P 64853

佛說觀無量壽佛經疏

并序

天台智者大師說

夫樂邦之與苦域金寶之與泥沙胎獄之望華池棘
林之比瓊樹誠由心分垢淨見兩土之升沉行開善
惡覩二方之麤妙喻形端則影直源濁則流昏故知
欲生極樂國土必修十六妙觀願見彌陀世尊要行
三種淨業然化因事漸教藉緣興是以闍王殺逆韋
提哀請大聖垂慈乘機演法曜玉相而流彩聳珍臺
而顯瑞雖廣示珍域而宗歸安養使末俗有緣遵斯
妙觀落日懸鼓用標送想之方大水結冰實表瑠璃

之地風吟寶葉共天樂而同繁波動金渠將契經而
合響觀肉髻而瞻侍者念毫相而覩如來及其暝日
告終上珍臺而高踊文成印壞坐金蓮而化生隨三
輩而橫截越五苦而長鶯可謂微行妙觀至道要術
者哉

此經心觀爲宗實相爲體所言佛說觀無量壽佛者
佛是所觀勝境舉正報以收依果述化主以包徒衆
觀雖十六言佛便周故云佛說觀無量壽佛經者訓
法訓常由聖人金口故言經也

釋經五義名體宗用教相云第一釋名者一切眾經

皆有通別二名通則經之一字別則有七或單人法
譬或複或具今經從能說所說人以立名卽教別同
名爲經卽教通爲行不同從一乃至無量卽行別同
會常樂卽行通理雖無名將門名理理隨於門四四
十六卽名理別門隨於理卽名理通此約一化以明
通別更約一題佛說卽教觀卽是行無量壽佛卽是
理教行理足任運有通別意更就一字說者釋論云
所行如所說說卽是教如卽是理行卽是行佛卽法
身觀卽般若無量壽卽解脫當知卽一達三卽三達
一一中解無量無量中解一於一字尚達無量義灑

諸字況一題況一經一切經耶故經云若聞首題名
字所得功德不可限量若不如上解者安獲無限功
德耶初釋佛者佛是覺義有六種卽涅槃經云一切
衆生卽是佛如貧女舍寶衆物具存力士額珠圓明
頓在如來藏經舉十喻獎帛裹黃金土模內像闇室
餅益井中七寶本自有之非適今也淨名云一切衆
生皆如也寶篋云佛界衆生界一界無別界此是圓
智圓覺諸法徧一切處無不明了雖五無間皆解脫
相雖昏盲倒惑其理存焉斯理灼然世間常住有佛
不能益無佛不能損得之不爲高失之不爲下故言

衆生卽是佛理佛也如斯之理佛若不說無能知者
法華云一百八十劫空過無有佛世尊未出時十方
常闍暝涅槃云於無量世亦不聞有如來出世大乘
經名若佛出世方能闡智慧日識三寶之光明開甘
露門知十號之妙味因說生解於寶適悅故須達聞
名身毛皆堅昏夜大朗巨闕自闢此名字佛也觀行
佛者觀佛相好如鑄金像心緣妙色與眼作對開眼
閉目若明若闇常得不離見佛世尊從大相海流出
小相浩浩瀼瀼如大劫水周眸徧覽無非佛界念一
佛與十方佛等念現在佛與三世佛等一身一智慧

力無畏亦然念色身念法門念實相常運念無不念時念念皆覺是名觀行佛也相似佛者念佛相好身得相似相應念佛法門身得相似相應念實相身得相似相應相似者二物相類如鑰似金若瓜比瓠猶火先煖涉海初平水性至冷飲者乃知渴不掘井聽說何爲略舉其要如法華中六根清淨即是其相名相似佛也分證佛者初發心住一發一切發發一切功德發一切智慧發一切境界不前不後亦不一時三智一心中得得如來妙色身湛然應一切開秘密藏以不住法卽住其中以普現色身作衆色像一音

隨類報答諸聲不動真際羣情等悅應以三輪度者能八相成道具佛威儀以佛音聲方便而度脫之況九法界三輪耶初住尚爾況等覺耶是名分證佛也究竟佛者道窮妙覺位極於茶故唯佛與佛乃能究盡諸法實相邊際智滿種覺頓圓無上士者名無所斷無上士者更無過者如十五日月圓滿具足衆星中王最上最勝威德特尊是名究竟佛義佛有無量德應有無量號舉一蔽諸華嚴有十萬號又經有萬號三世諸佛通有十號淨名三號以劫壽說不能盡何況諸號耶說者悅所懷也卽十二部經八萬法

藏六度四等一切法門又於一法中作四門分別於一一門巧作四悉檀利益聞者歡喜讚用受行信戒進念而得開發貪恚癡豁爾冰消革凡成聖入法流水或三二一益若都無益則樂默然若一機扣聖於一門施四益者餘三門亦如是爲一緣說一法既爾諸緣諸法亦如是觀者觀也有次第三觀一心中三觀從假入空觀亦名二諦觀從空入假觀亦名平等觀二空觀爲方便得入中道第一義諦觀心心寂滅自然流入薩婆若海此名出瓔珞經今釋其意假是虛妄俗諦也空是審實真諦也今欲去俗歸真故

言從假入空觀假是入空之詮先須觀假知假虛妄而得會真故言二諦觀此觀若成卽證一切智也從空入假觀者若住於空與二乘何異不成佛法不益衆生是故觀空不住於空而入於假知病識藥應病授藥令得服行故名從空入假觀而言平等者望前稱平等前破假用空今破空用假破用旣均故言平等觀此觀成時證道種智二空爲方便者初觀空生死次觀空涅槃此之二空爲雙遮之方便初觀用空次觀用假此之二用爲雙照之方便心心歸趣入薩婆若海雙照二諦也此觀成時證一切種智是爲次

第三觀也一心三觀者此出釋論論云三智實在一心中得祇一觀而三觀觀於一諦而三諦故名一心三觀類如一心而有生住滅如此三相在一心中此觀成時證一心三智亦名一切種智寂滅相種種行類相貌皆知也寂滅相者是雙亡之力種種相貌皆知者雙照之力也中論云因緣所生法卽空卽假卽中釋論云三智實在一心中得卽此意也此觀微妙卽一而三卽三而一一觀一切觀一切觀一觀非一非一切如此之觀攝一切觀也無量壽者天竺稱阿彌陀佛本無身無壽亦無於量隨順世間而論三身

亦隨順世間而論三壽亦隨順世間而論三量法身者師軌法性還以法性爲身此身非色質亦非心智非陰界入之所攝持強指法性爲法身耳法性壽者非報得命根亦無連持強指不遷不變名之爲壽此壽非長量亦非短量無延無促強指法界同虛空量此卽非身之身無壽之壽不量之量也報身者修行所感法華云久修業所得涅槃云大般涅槃修道得故如如智照如如境菩提智慧與法性相應相冥相應者如函蓋相應相冥者如水乳相冥法身非身非不身智旣應冥亦非身非不身強名此智爲報身法

壽非壽非不壽智既應冥亦非壽非不壽強名非壽爲壽法量非量非無量智既應冥亦非量非無量強名無量爲量也應身者應同萬物爲身也應同連持爲壽也應同長短爲量也智與體冥能起大用如水銀和真金能塗諸色像功德和法身處處應現往能爲身非身能爲常壽爲無常壽能爲無量能爲有量有量有二義一爲無量之量二爲有量之量如七百阿僧祇及八十等是有量之量如阿彌陀實有期限人焉莫數是有量之無量應佛皆爲兩量逐物隨緣參差長短然此三身三壽不可並別一異卽爭法體

卽一而三卽三而一乃會玄文釋名竟次辯體者體是主質釋論云除諸法實相餘皆魔事大乘經以實相爲印爲經正體無量功德共莊嚴之種種衆行而歸趣之言說問答而詮辯之譬衆星之環北辰如萬流之宗東海故以實相爲輕體也書家解禮者訓體也體有尊卑長幼君父之體尊臣子之體賤當知體禮之釋是貴極之法也復次體是底也窮源極底理盡淵府究暢實際乃名爲底釋論云智度大海唯佛窮底故以底釋體也復次體是達義得此體意通達無壅如風行空中自在無障礙一切異名別說皆與

實相不相違背釋論云般若是一法佛說種種名故以體達釋經體也次明經宗初簡宗體次正明宗有人言宗卽是體體卽是宗今所不用何者宗旣是二體卽不二體若是二體卽非體宗若不二宗卽非宗如梁柱是屋之綱維屋空是梁柱所取不應以梁柱是屋空屋空是梁柱宗體若一其過如是宗體異者則二物孤調宗非顯體之宗體非宗家之體宗非顯體之宗宗則邪倒無印體非宗家之體則體狹不周離法性外別有諸法宗體若異其過如是今言不異而異故有宗不一而一故有體也今此經宗以心觀

淨則佛土淨爲經宗致四種淨土謂凡聖同居土方便有餘土實報無障礙土常寂光土也各有淨穢五濁輕重同居淨穢體析巧拙有餘淨穢次第頓入實報淨穢分證究竟寂光淨穢娑婆雜惡荆棘瓦礫不淨充滿同居穢也安養清淨池流八德樹列七珍次於泥洹皆正定聚凡聖同居上品淨土也方便有餘者修方便道斷四住惑故曰方便無明未盡故言有餘釋論云出三界外有淨土聲聞辟支佛出生其中受法性身非分段生法華云若我滅後實得阿羅漢不信此法若遇餘佛於此法中便得決了就中復有

利鈍指上爲淨指下爲穢也實報無障礙者行真實法感得勝報色心不相妨故言無障礙純菩薩居無有二乘仁王經云三賢十聖住果報卽是其義釋論云菩薩勝妙五欲能令迦葉起舞華嚴云無量香雲臺卽其土淨妙五塵就中更論次第頓悟上下淨穢等也常寂光者常卽法身寂卽解脫光卽般若是三點不縱橫並別名祕密藏諸佛如來所遊居處真常究竟極爲淨土分得究竟上下淨穢耳故以修心妙觀能感淨土爲經宗也次辯經用用者力用也生善滅惡爲經力用滅惡故言力生善故言用滅惡故言

功生善故言德此皆偏舉具論必備也苦是惡果貪恚癡是惡因惡因不除果不得謝是故此經能令五逆罪滅往生淨土卽是此經之大力用也教相者此是大乘方等敎攝赴機適化廣略不同大本二卷晉永嘉年中竺法護譯此本是宋元嘉時畱良耶舍於揚州譯兩經皆在王舍城說復有小本名阿彌陀在舍衛國說阿彌陀無量壽彼此方言二藏明義菩薩藏收漸頓悟入此卽頓教正爲韋提希及諸侍女並是凡夫未證小果故知是頓不從漸入題稱佛說簡異四人弟子諸仙諸天化人等說也

分文爲三序正流通從如是訖清淨業處序分爾時世尊放眉間光訖諸天發無上道心正說當機益分爾時阿難白佛當何名下訖經流通分序中文二證信發起正說亦二淨業妙觀流通復二王宮鷲山初證信序六句如是標於信我聞異外道一時辯息諍佛正明化主王城論住處列衆爲同聞如是者諸法實相古今不異名如如理而說故爲是決定可信故云如是我聞者表異外道親承有在我者自在義一切法空無我何故說我隨俗假名說我謂見慢名字若無我則無聞若無聞化道則絕爲此義故雖知無

我爲傳化不絕假名說我如人以金錢易銅錢及草木等賣買法爾人無笑者故言我聞一者佛法無有定實之一云何稱一隨俗假說一耳釋論廣破一異也時者有二種一迦羅卽短時亦名實時二三摩耶名長時亦名假時今不論長短假實說此經竟總云一時佛者亦婆伽婆此云有大名聲亦云能破煩惱佛者平等開覺故名爲佛旣能自覺復能覺他覺行備滿一切智異外道慈悲異二乘平等異小菩薩尊極名爲佛在者暫時曰在久停名住一往語耳住者四威儀皆爲住差別者謂天住梵住聖住佛住也天

住謂六欲天因卽施戒善心也梵住從初禪至非想因卽四無量心也聖住三乘人因卽三三昧也佛住首楞嚴百八三昧十力四無畏十八不共也王舍城者天竺云羅閱祇伽羅釋論解摩伽陀國王有夫人生子一頭兩面四臂人謂不祥王卽裂其身首棄之曠野羅刹女鬼名閻羅還合其身以乳養之後大成人力能并國王有天下取諸國王萬八千人置此五山以大力勢治閣浮提間浮提人因此名王舍城也又先所住城城中失火一燒一作如是至七國人疲役集諸智人宜應易處卽求覓地見此五山周匝如

城卽作宮殿王於中住故名王舍又古昔國王名婆
數狀世學仙妄云天祀中應殺生啖肉身陷地獄其
子廣車次復爲王自念我父生入地獄今欲出家復
畏地獄欲治天下復恐有罪當何處身作是念時空
中語言汝行若見難值希有處當作舍住王出畋獵
見一鹿走疾如風王便逐之至此山周匝峻固其地
平正生草細軟好華徧地茂林華果溫泉浴池皆悉
清淨天雨天香奏天伎樂乾闥婆等適見王來各自
還去見此靈奇於中起舍故名王舍城也耆闍崛山
者翻名靈鷲諸聖仙靈依之而住又名鷲頭峯形似

鷲又山南有尸陀林諸鷲食屍竟棲其山然法身無像實不假地所居爲欲利益故隨化身明化主住處耳與大比丘衆下列同聞衆也先聲聞次菩薩顯示教中二乘外相爲勝菩薩心雖是勝外相無定是故後說也聲聞先標位次列數何不歎德非是無德譯經人略與者共義一處一時一心一戒一道一見一解脫等皆一故名共也今經與阿難諸大衆同聞故云與也大義有三謂大多勝天王大人所敬故言大徧解內外經書名曰多出九十五種上號爲勝此等皆是無學小乘中極故云大也比丘者因果六義因

名乞士怖魔破惡果號應供殺賊無生釋論淨目問舍利弗乞士者有四種食合藥種植田園名下口食仰觀星宿名仰口食四方巧語名方口食咒術卜算名維口食比丘不作此四名清淨乞士也怖魔者若發心出家地行夜叉唱飛行空中展轉乃至六天魔王聞之怖畏失人衆也破惡者能破煩惱九十八使悉皆破斷故名破惡衆者四人已上乃至百千無量一處羯磨作法行籌布薩事理二和無有違諍名和合衆也一有羞僧持戒無違二無羞僧不持戒不別好惡三無知僧雖不破戒不別輕重二人共諍不能

判決默然無言四真實僧謂學無學人今此二僧得
共羯磨同聞證信唯取無學人也千二百五十人者
列數也三迦葉兄弟有千弟子優樓此云木瓜林伽
耶此云城那提此云江昔共起刹今連枝也舍利弗
名翻言珠子亦云身子姓拘栗陀目犍連姓也翻讚
頌亦萊荻根或云胡豆二人共有二百五十人迦葉
舍利弗等先並事火翻邪入正艱苦累載都無所獲
一遇見佛便得上果感佛恩深常隨侍佛爲同聞衆
菩薩位中有四第一明位第二列數三萬二千人第
三標名文殊第四結爲上首天竺云摩訥菩提質帝

薩埵此云大道心成衆生文殊此云妙德以法化人
名法王子也二發起序者諸經不同或放光動地微笑
入禪自唱位號勸人令問今經正以殺父以爲發
起何故舉此逆事爲發起耶爲彰此界極惡令人厭
棄親所生子猶尚危害卽欲令人同欣淨土下韋提
希願爲我說無憂惱處不樂閻浮濁惡之世就中爲
二初爾時下正明殺父次問守門人下明欲害母問
頻婆何故遣人說法韋提何故如來自往答父願聞
法遣人傳授爲化義足母求生淨土非佛不開故須
自往頻婆娑羅此云摸實亦曰影堅韋提希此云思

惟阿闍世此云未生怨或婆羅留支此云折指內人將護名爲善見也初段爲四一頻婆爲子幽禁二國太夫人密奉王食以濟王命三漱口畢下聖爲說法以潤王心四如是時間下明因食兼由聞法多日不死初爾時王舍太子阿闍世者當佛在王舍城時未生怨者未生之日相師占之此兒生已定當害父隨順調達惡友敎者調達此云天熟亦云天授是斛飯王子是佛堂弟阿難親兄阿難此翻歡喜亦云無染或云欣樂調達有三十相出家誦六萬法聚滿十二韋陀爲利養故往詣佛所求學神通佛不爲說令觀

無常白可得道復至舍利弗曰連乃至五百弟子所皆不爲說取通之法阿難親未得他心授與通法調達入山學得五通心念誰作檀越闍世太子有大王相或自變身作象馬寶於王子前抱持歎歎復至天上取天華天食語王子言我作新佛汝作新王豈不快耶隨順惡友收執父王調達破僧舍利目連教化還合推山壓佛密跡金剛以忤擬之碎石逆來傷佛足指華色比丘尼呵之拳打眼出作三逆罪生入地獄頻婆往日毗富羅山遊行獵鹿空無所獲遇值一仙正坐使人驅逐令去遂勅殺之臨終惡念願我來

生還如今日心口害汝如此等事皆是大士善權現化行於非道通達佛道衆生根性不同入道有異一逆一順弘道益物示行無間而無惱恚闍王現逆爲息惡人令不起逆二明夫人奉食王食炒飲漿求水漱口合掌遙禮請受八戒澡浴清淨三聖爲說法目連是佛右面弟子昔爲辟支佛剃頭作袈裟願得神通授八戒者不殺不盜不婬不妄語不飲酒不著華香不觀聽伎樂不上高牀此八是戒不過中食是齋毗曇不著香衣不上高牀同是莊嚴處合爲一也富樓那此云滿願子亦滿慈子從父母得名說法第

一巧開人心故偏遣之四頻婆因食聞法遂得多日不死也次害母中爲四一爲子幽閉二因禁請佛三佛與弟子因請往赴四見佛傷歎請法初中又三一欲害母二二臣諫不聽害三勅內官幽閉初閻世問守門者王今在不二守門者以事實答三王閻瞋怒名父爲賊母爲賊伴卽執利劍欲害其母應殺守門人而欲害母者守門有辭王先有勅制諸群臣不言婦女沙門從空飛入非我所能禁王雖貪國殺父猶不違法劫初已來一萬八千未聞無道害母害母眼見何得言聞謂不忍聞世人傳說不宜住此欲奔他國

故云不住有國已來雖有刑罪不加女人況所生母
故不住也以手按劍却行而退者按劍現威以息王
忿也驚怖惶懼者畏懼也耆婆此云固活生時一手
把藥囊一手把針筒昔誓爲醫能治他病從德立號
菴羅女子也是國賢臣賢臣去必國亡也汝不爲我
者耆婆重諫慎莫害母懺悔求救前誓也卽便捨劍
止不害母勅語內官幽閉深宮韋提希被幽閉下第
二請佛謂請如來令遣弟子與已相見文爲二初明
請人次明請法韋提何故請見目連及以阿難目連
是門師阿難佛侍者先恒教誡故偏求見居在深宮

不敢偏求內獸惡界願生淨土欲令二人傳意請佛
悲泣雨淚望佛哀憐遙向佛禮前已禮竟今復重禮
表已殷勤世尊在耆闍下如來現宮不異勝鬘卽生
此念時佛於空中現也文爲五一神通二色身三坐
座四眷屬五雨華知韋提希心念者是知他心從崛
山沒王宮出顯神通也問前頻婆請弟子意在如來
今夫人亦請弟子意在佛何故前請遣弟子意在如來
往耶解有一義一闍王與調達殺父如來若躬赴恐
世王起怨嫌心爲護彼故不得自往二者佛法寄在
國王頻婆定死闍世當爲國主如來若往者王得國

主佛法不行故不得往夫人無此諸事如來自往傷
歎請法中有二意韋提見佛下正明請其生處今向
世尊下明請往生之因初明供養問往生因次問生
處也我有何罪生此惡子世尊復有何等因緣與提
婆達多而爲眷屬此經不答餘經說之昔於銳光佛
時釋迦爲摩納就珍寶仙人學學習既成念欲報恩
自惟貧乏于時耶若達欲嫁女時有須摩提求爲女
婿聰明有智而形貌醜摩納遇見論義須摩提屈在
言下耶若達歡喜大賜珍寶以女妻之摩提生忿發
誓未來世世常惱爲此因緣常觸惱也濁惡者濁五

濁也一見二煩惱三衆生四命五劫惡者十惡也殺
盜婬妄語惡口兩舌绮語貪瞋邪見也三途地獄名
泥犁譯云不可樂畜生云旁行從主畜養爲人驅使
食噉餓鬼飢虛怯畏三千剝土同有此惡故曰盈滿
多不善聚惡道因也無人不起故名曰多人常現行
殺盜婬等違理枉物爲不善積集稱聚也願我未來
不聞惡聲不見惡人今向世尊五體投地兩肘兩膝
頭項是爲五體也懺摩梵言悔過漢語彼此並舉故
云懺悔將果驗因知過去有罪恐償未盡來更受故
須懺悔惟願佛日啓告所求佛能破壞衆生癡闇如

日除昏故言佛日教我觀於清淨業處序文竟
爾時世尊放眉間光下第二正說文爲三初明淨業
次辯妙觀三利益如來眉間有白毫相猶如珂雪長
一丈五尺毫有八楞周圍五寸其毫中空右旋宛轉
如瑠璃筒從此發光照無量國還住佛頂變爲金臺
廣現諸國令韋提希樂生安養初放光酬前請於生
處次世尊微笑下酬前淨業近答思惟正受三種淨
業散心思量名曰思惟十六正觀說名正受就初有
二第一答其生處惟願下明見淨土更請淨國之因
初放光普示諸土次或有下示土差別韋提下示生

處思惟是願願思是業正問其因正受者非邪曰正
領納名受卽第二問觀行微笑中有二初明三種淨
業答思惟汝是凡夫下次明十六妙觀答正受初業
共凡夫次共二乘後是大乘不共之法初淨業中有
三第一明三種淨業告阿難下第二歎其所問妙契
佛心從阿難汝當受持下第三略付阿難令持獲利
也就初復三初明光照頻婆獲道次世尊告韋提汝
今知不下舉果勸修因三欲生彼國者下明往生之
因也何以不直答其土因而復放光微笑耶解有二
初爲次增道次欲使王與夫人因光相見王旣覩光

增道知國非實視死如眠夫人見王無憂觀法成果也微笑如釋種被誅如來光色益顯正以如來善達因緣業報無差對至匡避王雖應死而獲道跡夫人幽繫卽是現淨土之緣有此多緣所以致笑也阿那含者第三不還果也去此不遠者安樂國土去此十萬億佛刹一一刹恒沙世界何言不遠解云以佛力故欲見卽見又光中現土顯於佛頂一念能緣言不遠也第一孝養父母奉事師長敬上接下慈心行也修十善業是其止行身除三邪口離四過意斷三惡也第二三歸者佛法僧也在家戒亦卽是十戒具足

衆戒者道俗備受微細不犯威儀者三千悉皆不缺也第三發菩提心是願起意趣向名爲發心菩提是道佛果圓通說爲菩提讀誦大乘明修解也行能運通說之爲乘餘二不及是言大也佛告韋提此三種業三世諸佛淨業正因是歎辭也諦聽諦聽善思念之諦聽令生聞慧善思思慧念之修慧煩惱賊者此能損慧命傷法身故名爲賊也卽得無生忍是初住初地仁王經說五忍一伏二信三順四無生五寂滅初明韋提見土之由次一問答明爲未來衆生請見土之方法汝是凡夫彰其分齊不能遠觀韋提實大

菩薩此會卽得無生忍示同在凡夫心想羸劣未得天眼不能遠照見彼國土有異方便令汝得見異方便者卽十六觀非直觀名方便以佛力故見彼國者亦是方便也韋提白佛如我今者下爲佛滅後衆生請也濁者五濁不善者十不善五苦者五道非樂故云五苦或是五惡五痛五燒五惡殺盜邪姪妄語飲酒如大經現遭厄難王法刑罰是五痛也五燒卽當來墮三途苦毒名五燒云何當見阿彌陀極樂國土正爲啓請答中有十六觀一日觀二水觀三地觀四樹觀五池觀六總觀觀一切樓地池等七華座觀八

佛菩薩像觀九佛身觀十觀音觀十一勢至觀十二普往生觀十三雜明佛菩薩觀十四上品生觀十五中品生觀十六下品生觀就十六觀分文爲三初六觀觀其依果次七觀觀其正報後三明三輩九品往生也

第一日觀示令繫心佛告下略明繫念總勸修觀云何下正明作日觀一切有目皆見日沒下舉所觀境當起想下正教觀察是爲下結也教令正觀爲除疑心大本所明以疑惑心修諸功德生彼國者落在邊地復受胎生故作此觀令除疑惑也障者大本言唯

除五逆誹謗正法故須作觀五逆重罪除六十劫生死罪等下輩自論

第二水觀初作水想者舉所觀境界從見水澄清下正起觀行是爲水想下結觀也一作水想二變水成冰三變冰爲瑠璃四觀瑠璃以成大地內外映徹地下寶柱承擎地上諸相莊嚴以衆寶間錯其地一一寶出雜色光明光明成諸樓觀樓觀兩邊有華幢幢上多有樂器宣說妙音也八種清風者彼處實無時節若寄此八謂除上下餘四方四維故云八亦可用對八卦也

第三地觀文有四一漸想觀從若得三昧下第二實觀佛告下明利益作是觀下顯觀邪正前水是想不能滅罪地觀是實故能除斷也

第四樹觀文三初明結前生後次觀寶樹下正明觀行是爲下結正觀中有五一明樹體一明莊嚴相三明生法四有大光明下現佛國土五見樹莖葉下結觀也

第五池觀中有五一明池體二明池相三明隨心通意四明利益第五結觀摩尼者如意味也八功德者輕清冷軟美不臭飲時調適飲已無患清是色入不

臭香入輕冷軟是觸入美是味入調適無患是法入第六總觀中有四衆寶國土下明總觀初寶樓二樹三地四池觀樓中初正觀樓次觀上及虛空中諸音樂聲結成觀想名爲粗見從是爲下二結從若見下第三利益作是觀下第四顯觀邪正

第七明佛身中有四第一佛告下勅聽許說第二從說是語時下明佛現身相第三從時韋提下爲未來請第四佛告下酬請廣明佛身五種觀門第一觀華座第二觀像第三觀佛身第四觀觀音第五觀勢至初華座中有五一明成座法用并辯其相二一一金

色下明能隨機利物三是爲華想下結觀四阿難如此華下明由願力所成五若欲念彼佛下明觀未來有利益

第八明像想中有三初汎明諸佛法身自在從心想生二是故應當下偏觀彼彌陀并示觀行三作是觀者下明修觀獲利也法界身者報佛法性身也衆生心淨法身自在故言入衆生心想中如似白日昇天影現百川即是三十二相八十種好明佛身自在能隨物現前明佛菩薩此顯能隨也又法界身是佛身無所不徧法界爲體入一切衆生心想中者得此觀

佛三昧解入相應故言入心想中也是心作佛者佛本是無心淨故有亦因此三昧心終成作佛也是心是佛者向聞佛本是無心淨故有便謂條然有異故言即是心外無佛亦無佛之因也始學名作終成即是佛若當現分別諸佛法身與已同體現觀佛時心中現者即是諸佛法身之體名心是佛望已當果由觀生彼名心作佛也正徧知海從心想生者以心淨故諸佛卽現故云生也亦因此觀佛三昧出生作佛多陀阿伽度或明十號無量名號等此中略舉三號卽如來應供正徧知天竺三名相近阿羅訶翻應供

阿羅漢翻無生阿盧漢翻殺賊令與修多羅合者觀行之時令與教法相應故言合也又解與十二部經教合入定是修多羅出定之時心與定合故云與修多羅合也

第九觀佛真法身中有五一明結上第二次當更觀下正觀佛身第三從作是觀下正明觀於佛心第四從作此觀者捨身他世下舉利勸修第五從作是觀者下顯觀邪正觀身大小高六十萬億那由他恒河沙由旬毫相如五須彌山須彌山舉高三百三十六萬里縱廣亦爾彼佛毫相過此五倍眼如四大海水

準眼量以度身身量太長世人身長七尺者眼長一寸餘四大海水一海八萬四千由旬四海合三十三萬六千由旬身過其眼五十六億倍假令極多無出萬倍何緣佛身得長六十萬億那由他由旬言恒河沙者譯人謬耳眼見佛身卽見佛心身由心起故見身卽見心由見身心想轉明故得見佛心佛心者大慈悲心是以無緣慈普攝衆生釋論云慈有三種一衆生緣無心攀緣一切衆生而於衆生自狀現益如涅槃經我實不往慈善根力能令衆生見如斯事二法緣者無心觀法而於諸法自然普照如日煦物無所分別三者無緣無心觀理而於平等第一義中自然安住以無緣慈攝諸衆生辯佛心相也念佛衆生攝取不捨者若爲佛慈悲所護終得離苦永得安樂釋論云譬如魚子母若不念子則爛壞衆生亦爾佛若不念善根則壞今明無緣慈者諸佛所被謂心不住有無不依三世知緣不實以衆生不知故實相智慧令眾生得之是爲無緣也捨身他世生諸佛前以修念佛三昧故發見佛願生生常值如人習巧從少至長所作遂妙以隨念佛三昧故得生無量壽佛國故般舟

經云衆生問佛何因緣得生此國彌陀佛答以修念佛三昧得生我國也從一相好入但觀眉間白毫者如觀佛三昧經云釋迦如來眉間白毫者云實性論明佛毫相在兩眉間闊三百六十萬里方圓亦然故文云無量壽佛身量無邊非是凡夫心力所及正可取如釋迦毫相大小現觀若得三昧觀心成就方可稱彼佛相而觀也智度論云爲增長諸菩薩念佛三昧故說般若波羅蜜經今說般若現奇特身相光明色像徧至十方以此爲觀也

第十觀觀音中有三初結上次復應觀觀世音菩薩下正明觀菩薩身也第三作此觀者觀之邪正也觀菩薩法身中有三初觀身相冠中立化佛者帶果而行因也第二明與佛同異第三佛告阿難下還舉利勸修也釋迦毗楞伽翻能聖

第十一勢至中有三初明因光神力制二種名次此菩薩天冠有五百寶下明與觀音同異後除無量劫罪下勸修略無觀法當不異上故不重明所以觀佛先作像想後觀法身菩薩直明法身者但佛法身妙極不可一往而觀故先作像想流利後觀法身則易菩薩者觀佛既竟次二大士是眷屬莊嚴如王來卽

有營從有佛必有菩薩也

第十二普觀普雜何異而爲二耶普觀作自身往想稱彼境界一一具觀雜觀明佛菩薩神力自在轉變非恒大小不定或隨物現故名爲雜以此爲別普中有二初從見此事時當起自心下作自身往想次無量壽佛化身下佛及菩薩化身來現也

第十三雜觀有二第一觀丈六像第二無量壽佛身量無邊下明彌陀變現自在堅固行者常令習觀修行不倦所觀若大若小皆是佛身拂去衆疑生人重意衆云何疑前聞廣大無量今聞觀小疑非佛身於

小不敬故須拂去明皆是佛生其重意但觀手相者有作頭首解者上言觀音頭上天冠中有一立化佛勢至頭上有寶鉢以此爲別作手解者上云其手柔軟有八萬四千畫以此寶手接引衆生皆是經文用無在也

第十四上品生觀此下三觀觀往生人者有二義一爲令識三品往生捨於中下修習上品二爲令識位之上中下卽是大本中三品也釋會經論者問依往生論二乘不得生此經中輩小乘得生答正處小行不生要由垂終發大乘種爾乃得生經說現今論舉

本始何故復證小果釋雖復垂終發大心先多學小至彼聞苦空無常發其本解先證小果得小果已於小不住必還入大問論女人根缺不生此經韋提希及五百侍女同皆往生釋言論說女人根缺不生者就彼爲言生彼國者淨根離欲故無女人身根精上故無根缺經語初往故有善心一切得往問大本五逆謗法不得生此經逆罪得生釋有兩義約人造罪有上有下上根者如世王造逆必有重悔令罪消薄容使得生下根人造逆多無重悔故不得生二者約行行有定散觀佛三昧名定修餘善業說以爲散散

善力微不能滅除五逆不得往生大本就此故言不生此經明觀故說得生就三品中更爲九上品之人始從習種終至解行菩薩中品者從外凡十信已以下品卽是今時悠悠凡夫何以得知上品見佛聞法便悟無生故是道種人下品備造四重衆罪亦得往生類此似爾上品位當道種中品位當性種下品位當習種一得道有遲疾二所乘有異初則金剛臺中紫金臺下金蓮華就初中文爲三第一標第二若有衆生願生彼國下正釋第三從是名下結釋中復四初明修因第一從生彼國時下明值緣第三從行者

見已下正明得生第四從生彼國下生後利益至誠心者卽實行衆生至之言專誠之言實深者佛果深高以心往求故云深心亦從深理生亦從厚樂善根生故十地經言入深廣心涅槃經云根深難拔故言深心六念者佛法僧施戒天六事安心不動稱之爲念也無生忍言登初地也陀羅尼者一能特善二能遮惡是總持也上品中生者有三第一標第二釋第三結釋中有四初住生因第二行此下明值緣第三行者自見下得生第四行者身作紫磨金色下往生利益甚深第一義者謂諸法實相言語道絕心行處

滅名之深妙精進最稱第一阿耨不退轉者謂道種菩提亦通是道種地不退位現前受記者四種受記一往現前也上品下生中有三初標第二亦信因果下釋第三是名下結釋中有四第一明往生之因第二行者命欲終時下值緣第三見此事時下得生第四一日一夜下生後利益得百法明門者地論云入百法明門增長智慧思惟種種法門義故歡喜地者初證聖處多生歡喜也

第十五中品生觀中品上生者有三第一標第二從若有衆生下釋第三從是名下結釋中有四初明生

因第二從臨命終時阿彌陀佛下值緣第三從行者見已下得生第四從當華敷時下明生後利益五戒者不殺盜婬妄語飲酒也八戒者加不上高牀不著華鬘瓔珞香全身熏衣不得歌舞作樂及往觀聽也四諦者苦集滅道也羅漢者應供不生殺賊也三明者過現未來明也六神通者天眼天耳他心宿命漏盡身得如意此六悉皆無壅故爲通八解脫者一內有色相外觀色二者內無色相外觀色三者淨四空處五識處六無所有處七非非想處八滅盡解脫也此八中前三種微妙五欲無染無著中四於下得離

後一能脫心慮故名解脫亦名背捨背者背彼淨潔五欲也捨者離是著心也釋會者論明小乘不生者決定不生此中明生退菩提心得生至彼處無漏道熟卽證第四果大論亦然或接引小乘然彼實無中品應時卽得羅漢何以不及九品解云是退菩提聲聞往生彼國無漏道熟便證小果不守小位而往還起大心進行彌遠或五劫或十劫得成初地如是階級猶是其勝大本上品明其出家中品不明出家此中所明是則中品若其不出家經云一日一夜持沙彌戒故知有也而大本不明據長時始終爲語今言

出家者就短時而論中品中生者有三初標第二從若有衆生下釋第三從是名下結就釋中有四初明因第二從如此行者下明值緣第三從行者自見下明得生第四在寶池中下明生後利益也十戒者卽前八戒更足不捉金銀生像及不過中食爲十戒也具足戒者二百五十戒五百戒等須陀洹者翻修習無漏或逆流也中品下生者有三初標第二從若有下釋第三是名下結釋中有四初明因第二此人命終時下明緣第三從聞此事下得生第四從經七日下生後利益也

第十六下品生觀下品上生者有三初標第二從或有衆生下釋第三從是名下結釋中有四初明因第二從爾時彼佛下明緣第三從作是語下明得生第四經七七日下明生後利益也下品中生者有三一標二釋三結釋中有四初明因第二從吹諸天華下明緣第三從如一念頃下明得生第四從經六劫下明生後獲利也下品下生有三初標二釋三結釋中有四初明因第二從見金蓮華下明緣第三從如一念頃下明得生第四從於蓮華中下明獲利稱無量壽佛至於十念者善心相續至於十念或一念成就

卽得往生以念佛除滅罪障故卽以念佛爲勝緣也
若不如此者云何得往生也問云何行者以少時心
力而能勝於終身造惡耶大論有此責是心雖少時
而力猛利如垂死之人必知不免諦心決斷勝百年
願力是心名爲大心以捨身事急故如人入陣不惜
身命名爲健人也第二利益中有二初明夫人道悟
無生二明侍女發心也

第三流通亦二第一明王宮流通第二爾時世尊足
步下明崛山流通初有四一列名教持二行此下明
修有益勸人奉信三告阿難下付囑令持四說此下

目連等聞歡喜初中阿難先問發當何名下問經名
字上來所說言義非一當於何義而名此經此法之
要云何受持問受持法佛答名觀極樂無量壽佛觀
音勢至亦名淨業生諸佛前對其初問汝當受持無
令忘失對其後問次明有益行前十六觀門得大利
益現身得見彼佛菩薩善男子善女人聞名下明其
念佛菩薩之益但得聞名除無量罪何況憶念明念
佛菩薩有大利益舉劣況勝念佛者人中分陀利華
明其身勝觀音勢至爲勝友伴勝當坐道場得道之
場名曰道場菩提樹下得道故名爲坐依之得果義

說爲坐依之起行名生佛家也結名付囑亦名觀無量壽佛亦名滅除業障也歡喜者三義故喜一能說人清淨佛無礙智無有錯謬名爲清淨二所說法清淨能令衆生得證三昧三依法所得果清淨依法修行滿足身證清淨果也耆山流通中初佛步空還耆闍崛山爲增物敬奉順其言故現此變次阿難及天龍等聞法歡喜作禮而去也

佛說觀無量壽佛經疏

音釋	瓊	<small>渠營切</small>
	赤玉也	
模	末各	<small>駢</small>
切		<small>方六重也</small>
也	漱	<small>瀆</small>
鬟	<small>蘇奏切</small>	<small>余亮水貌</small>
切		
莫還	歎	<small>崛</small>
筒	<small>蕩口也</small>	<small>渠勿</small>
切	歎	
紅	<small>歎屋徒切</small>	
繁		
糾繫也	吮	<small>丘虔切</small>

浙江嘉興府楞嚴寺般若堂本年貲刻此觀無量壽經疏一萬二千五百八十該銀七兩二錢五分

觀無量壽佛經疏妙宗鈔卷第一

宋四明沙門知禮述

此經義疏人稀淨報故說聽者多矣所稟寶雲師首
製記文相沿至今著述不絕皆宗智者豈有不知修
心妙觀感四淨土文義者耶良以愍物情深適時智
巧故多談事相少示觀門務在下凡普霑緣種方今
嘉運盛演圓乘慕學之徒皆欲得旨而修證矣故竭
鄙思鈔數千言上順妙宗略消此疏適時之巧非我
所能願共有情卽心念佛乃此鈔所以作也天禧五
年歲在辛酉重陽日下筆故序

此之疏題佛等八字備舉經目皆是所釋唯疏一字
是能釋也今之五章釋其八字義稍委悉入文自見
若欲預知可陳梗槩經是通號餘是別名今且明別
佛說者釋迦化主四辯宣演也觀者總舉能觀卽十
六觀也無量壽佛者舉所觀要攝十五境也且置能
說略明所說能觀皆是一心三觀所觀皆是三諦一
境毗盧遮那徧一切處一切諸法皆是佛法所謂衆
生性德之佛非自非他非因非果卽是圓常大覺之
體故起信論云所言覺義者謂心體離念離念相者
等虛空界無所不徧法界一相卽是如來常住法身

依此法身說名本覺故知果佛圓明之體是我凡夫
本具性德故一切教所談行法無不爲顯此之覺體
故四三昧通名念佛但其觀法爲門不同如一行三
昧直觀三道顯本性佛方等三昧觀祖持顯法華兼
誦經觀音兼數息覺意歷三性此等三昧歷事雖異
念佛是同俱爲顯於大覺體故雖俱念佛而是通途
顯諸佛體若此觀門及般舟三昧託彼安養依正之
境用微妙觀專就彌陀顯真佛體雖託彼境須知依
正同居一心心性徧周無法不造無法不具若一毫
法從心外生則不名爲大乘觀也行者應知據乎心

性觀彼依正依正可彰託彼依正觀於心性心性易發所言心性具一切法造一切法者實無能具所具能造所造卽心是法卽法是心能造因緣及所造法皆悉當處全是心性是故今觀若依若正乃法界心觀法界境生於法界依正色心是則名爲唯依唯正唯色唯心唯觀唯境故釋觀字用一心三觀釋無量壽用一體三身體宗力用義並從圓判教屬頓五重玄義本是經中所詮觀法大師預取解釋經題欲令行者用此觀法入十六門而爲修證故於序文以主包衆以正收依觀佛旣卽三身觀餘豈非三諦寄語行者觀雖深妙本被初心若能進功何憂不就縱未入品爲因亦強生至彼邦得預大會所見依正微妙難思速入聖階度生亦廣永興事善及小乘行得往生者如此土人宿圓修者於諸座席見相殊常聞法易悟以此類彼功在妙宗但爲戒福不精無往生願故在穢土聞法入真須懼娑婆不常值佛縱遇善友色心不勝難發我心況塵境麤強誠爲險處故須外加事懺內勤理觀正助雙行加願要制必於寶刹速證無生今解觀門其意在此疏者疎也決也疎通決擇上之義趣通而不壅令其行者得意修之故也次

能說人號備於別傳及諸章記有未知者須尋彼文
二釋文初釋序三初叙經觀意二初正明觀行二初
叙意二初對垢立淨二初法二初明二報苦樂欲論
觀行先示二報苦樂之相文有四句一一皆論淨穢
相對初句以所成國土苦樂相對安養淨國但受諸
樂故名樂邦堪忍穢土多受衆苦義言苦域次句以
能成物體貴賤相對彼純七珍略言金寶此多衆穢
略語泥沙次句以初生受質垢淨相對此土六道具
有四生今就人中多從胎藏母食冷熱及飢飽時兒
在胎中如處寒熱倒懸山壓地獄之苦故云胎獄彼

土九品八從蓮生下品之人雖經多劫大本中說疑
心修善生彼胎宮樂同忉利況八九品不生疑惑豈
有苦邪是故華池受生卽樂次句以生後疑處麤好
相對此則荆棘叢林彼則金渠玉樹然此四句雖一
一句苦樂相對意則對穢顯彼淨相又復應知四句
之文似唯顯示同居二土據下明宗具論四土淨穢
之相以後驗此不專同居當知四句一一通於四種
淨穢見思輕重則感同居樂邦苦域體析巧拙則感
方便樂邦苦域次第頓入則感實報樂邦苦域分證
究竟則感寂光樂邦苦域以例金寶泥沙胎獄華池

棘林瓊樹亦復如是一家制立正文與序必不相違
但序總示宗文別說是故似異問下三淨土既皆有
相則可論於金寶等事寂光之淨已全無相如何可
說金寶華池及以瓊樹答經論中言寂光無相乃是
已盡染礙之相非如太虛空無一物良由三惑究竟
清淨則依正色心究竟明顯故大經云因滅是色獲
得常色受想行識亦復如是仁王稱爲法性五陰亦
是法華世間相當大品色香無非中道是則名爲究
竟樂邦究竟金寶究竟華池究竟瓊樹又復此就捨
穢究竟取淨窮源故苦域等判屬三郭樂邦金寶以

爲寂光若就淨穢平等而談則以究竟苦域泥沙而
爲寂光此之二說但順悉檀無不圓極問佛無上報
是卽理之事可論金等究竟寂光是卽事之理豈有
金等若其同有事理旣混如何分於二土義耶答佛
無上報是究竟始覺上品寂光是究竟本覺始本旣
極豈分二體應知二土縱分事理實非有無豈真善
妙有而非理邪祕藏之理豈同小空故此事理二名
一體以復本故名無上報事也以復本故名上寂光
理也故妙樂云修得四德本有四德二義齊等方是
遮那身土之相況淨名疏顯將寂光爲佛依報故知

定執報土有金寶等寂光定無斯乃逃名全不知義矣二誠由下明二因心行誠實也由從也報之淨穢實從心行二因致感心卽逃了二心行卽違順二行六道三教逃三德性爲三惑染故曰垢心身口諸業違理有作皆名惡行此之心行感四穢土沉下麤淺也唯圓頓教了三德性離三惑染方名淨心身口諸業順理無作稱爲善行此之心行感四淨土高升深妙也心雖本一以逃了故須分垢淨行業雖同以違順故須開善惡從此二因感報淨穢應知圓人以上寂光而爲觀體凡聖因位皆卽究竟不同別人要心

只齊一十二品故分證穢正在別教問至理微妙不垢不淨無取無捨今立垢淨令人取捨旣乖妙理卽非上乘何得名爲修心妙觀顯一實相答據名求義萬無一得以義定名萬無一失良以理外理內小乘大乘漸次圓頓所立名言率多相似須以邪正定其內外次以空中甄其小大復以漸頓分其別圓則使名言纖毫不濫方可憑之立乎觀行是故今家評此等義而用六句判於同異所謂相破相修相卽各有二句卽六句也今用此六判此相違先以別義定其同名所謂外道斷無不垢不淨見二乘空理不垢不

淨證別教但中不垢不淨門圓教祕藏不垢不淨理復有四淨外道欣厭執淨之見二乘斷惑滅淨之證別教離染漸淨之門圓教卽染頓淨之理旣知此已乃可論於淨與不垢不淨相破之句圓教頓淨破於別教二乘外道不垢不淨圓教不垢不淨破於三種之淨相修句者三種之淨修於圓教祕藏不垢不淨三種不垢不淨修於圓教卽染之淨相卽句者圓教卽染之淨卽是祕藏不垢不淨祕藏不垢不淨卽是卽染之淨今之妙觀卽於染心觀四淨土旣照寂光豈異秘藏不垢不淨邪若謂今經捨穢取淨異於秘

藏雙非理者何故革提聞觀淨土分證祕藏邪應知今淨淨於垢淨乃以垢淨平等之理而爲於淨土名偏義圓斯之謂矣但以機緣捨穢心強宜以淨門淨一切相故今談淨與不垢不淨全不相違又復應知取捨若極與不取捨亦非異轍二喻形端喻淨因了性淨心順理善行影直喻果四淨土也源濁喻穢因述性垢心違理惡行流昏喻果四穢土也若翻上喻形曲影凹自可喻於逆修因果若翻下喻源淨流清亦自可喻順修因果今舉二喻各喻一種其義甚明二故知下就淨示修上已對穢顯於淨相故今就淨

而明修法前示二因通云淨心及以善行此明修相
故的指今十六妙觀三種淨業於十六境不照三諦
豈明妙觀修三種福爲三惑染不稱淨業妙觀是正
淨業爲助正助合行能感四種極樂國土得見三身
彌陀世尊文從互說觀論生土業論見佛依正既俱
正助非隔二然化下示文二初示教興二初明興由
華凡之化要因近事而爲湧漸詮理之教必藉機緣
方得興起近事爲漸通於諸化今化別由殺逆之事
欲令衆生厭濁世故此教當機是韋提希華言思惟
善修觀故二大聖下明現土佛是極聖故稱爲大佛

慈下被名之曰垂託韋提請布所證理名乘機演法
曜玉相等者經云爾時世尊放眉間光徧照十方無
量世界還住佛頂化爲金臺如須彌山雖廣示等者
經云十方妙國皆於中現或有國土七寶合成復有
國土純是蓮華乃至云時韋提希白佛言是諸國土
雖復清淨我今樂生極樂世界阿彌陀佛所二使未
下示觀相二初總標使末俗等者經云如來今者教
韋提希及未來世一切衆生觀於西方極樂世界以
佛力故當得見彼清淨國土等二落日下別示十六
觀法不出三類卽依報正報及三輩往生今順此三

撮要而示文自爲三初依報初觀落日狀如懸鼓令心堅住專想不移此有二意一令觀日心不馳散二令心想正趣西方故云用標送想之方次觀清水復想成冰良以彼土瑠璃爲地此地難想且令想冰冰想若成寶地可見故云實表瑠璃之地次示樹觀而經但云其諸寶樹七寶華葉無不具足而無風吟天樂之事乃取小本中語成今樹觀之文故彼經云微風吹動衆寶行樹及寶羅網出微妙音譬如百千種樂同時俱作故云共天樂而同繁次示池觀經云有八池水從如意珠王生分十四支黃金爲渠其摩尼

水流澍華間其聲微妙演說苦空無常無我諸波羅蜜等故云將契經而合響二觀肉下示正報先明觀音勢至二菩薩觀以此二觀皆明肉髻故經云若有欲觀觀世音菩薩者先觀頂上肉髻次觀天冠其餘衆相亦次第觀之勢至經云頂上肉髻如鉢頭摩華於肉髻上有一寶餅盛諸光明普現佛事餘諸身相如觀世音等無有異斯是如來敎示行者想二大士觀法之要也此二菩薩次當補處今爲近侍故云瞻侍者也次示彌陀觀經云觀無量壽佛者從一相好入但觀眉間白毫極令明了見眉間白毫者八萬四

千相自然當現豈非教示觀法之門故云念毫相而
覩如來也三及其下示三輩觀下疏判云觀三品往
生有一意一令捨中下修上品故二令識位高下卽
大本三品故此之二意初策自行次則觀他故今略
叙就策自行卽修觀行人功有淺深致使往生相分
三品故云及其次瞑目告終等也初明上品上生及上
品中生以經明上生乘金剛臺中生生紫金臺故云
上珍臺也次文成下明上品下生經云卽見自身坐
金蓮華文成印壞者大經二十七云譬如蠟印印泥
印與泥合印滅文成以喻凡夫現在陰滅中有陰生
今借此文以喻往生菩薩此土陰滅彼國陰生須知
垂終自見坐金蓮身已是彼國生陰故也成論明極
善極惡俱不經中陰如積矛離手也上雖三品但是
上輩次總示三輩往生之者俱出輪迴言隨三輩者
非謂隨他蓋是隨已所修三輩行業皆能橫截五道
永得不退也大本云往生安養國橫截五惡道五苦
者此方五道俱不免苦天道縱樂還墮惡趣故二可
謂下結歎觀行微行者歎三種業雖是身口運爲之
善今順理修皆成無作幽微無相之行也妙觀者歎
十六觀雖託安養依正之境而皆稱性絕待照之卽



不思議圓妙觀也此之觀行能令修者達四淨土縱具見思而能不退誠爲至極之道要妙之術如此歎結意令聞者尚之修之不肖之徒輕欺生死不求不退於斯要術生謗鄣人痛哉痛哉二此經下叙經宗體心觀者經以觀佛而爲題目疏今乃以心觀爲宗此二無殊方是今觀良以圓解全異小乘小昧唯心佛從外有是故心佛其體不同大乘行人知我一心具諸佛性託境修觀佛相乃彰今觀彌陀依正爲緣熏乎心性心性所具極樂依正由熏發生心具而生豈離心性全心是佛全佛是心終日觀心終日觀佛

是故經目與疏立宗語雖不同其義無別又應須了若觀佛者必須照心若專觀心未必託佛如一行三昧直觀一念不託他佛而爲所緣若彼般舟及此觀法發軫卽觀安養依正而觀依正不離心性故曰心觀須知此觀不專觀心內外分之此當外觀以由託彼依正觀故是以經題稱爲觀佛若論難易今須從易法華玄云佛法太高衆生太廣初心爲難心佛衆生三無差別觀心則易今此觀法非但觀佛乃據心觀就下顯高雖修佛觀不名爲難是知今經心觀爲宗意在見佛故得二說義匪殊途又應了知法界圓

融不思議體作我一念之心亦復舉體作生作佛作依作正作根作境一心一塵至一極微無非法界全體而作既一一法全法界作故趣舉一即是圓融法界全分既全法界有何一物不具諸法如義例中僻解師云四教中圓唯論心具一切諸法身色依報則不論具唯一頓頓方明三處皆具諸法荆谿論曰四教中圓何嘗不云三處具法稟今宗者若云心具色等不具同彼謬立漸圓之見望彼頓頓天地相懸尚劣於彼何預今宗以一切法一一皆具一切法故是故今家立於唯色唯香等義若其然者何故經論多

以一心爲諸法總立觀境邪良以若觀生佛等境事既隔異能所難忘觀心法者近而復要既然是能造具義易彰又卽能觀而爲所照易絕念故妙玄云三無差別觀心則易縱觀他境亦須約心此經正當約心觀佛也實相爲體者心觀之宗方能顯發中道實相深廣之體所以者何若於心外而觀佛者縱能推理但見偏真卽如善吉觀佛法身但證小理今約唯心觀佛依正當處顯發中實之體中必雙照三諦具足故云此經心觀爲宗實相爲體文特於此舉宗體者成前叙觀顯後叙題成前者以叙觀文雖具三觀四

土之義語且總略恐失意者謂但叙於同居淨土觀行之意故叙觀畢特示唯心妙觀之宗以顯中道實相之體實相既是常寂光土若謂十六只觀應佛依正之相豈能顯此實相寂光若於十六用圓三觀尚能感得寂光極樂豈不能感三土極樂以此成前樂邦金寶等諸文義皆明四種淨土因果也顯後者行人若得此宗體意則知叙題能說之佛所說觀境徒衆依報及以通名如是諸義悉皆圓妙非小非偏方是今經首題名字叙觀叙題兩楹之際示乎宗體其意在茲三所言下叙經題目二初別題七字具含能

說所說能觀所觀正文釋名備顯其義今序但明以勝攝劣攬別爲總立題之意也以十六境佛境最勝故云佛是所觀勝境蓋十六觀不出依正及以徒主若論依正佛是正報舉正收依則攝日冰地樹等六觀也若分徒主佛是化主述主包徒則攝觀音勢至三輩等九觀也故云觀雖十六言佛便周故入正文以圓三觀釋乎能觀以妙三身釋所觀佛佛既總攝餘十五境豈不一一皆是圓妙三諦三觀邪二經者下通題儒經講解有茲一訓萬代軌則故訓法也百王不易故訓常也佛經亦然十界咸規三世不易復

以由義而釋於經由佛大聖金口宣吐自證之法故名爲經法華玄義委解通名當宗學人不可不究二入文二初取義釋題二初標列注云云者令依諸部明於通釋五章之義妙玄最委故彼文云就通作七番共解一標章二引證三生起四開合五科簡六觀心七會異標章令易憶持起念心故引證據佛語起信心故生起使不雜亂起定心故開合料據會異等起慧心故觀心卽聞卽行起精進心故五心立成五根排五鄣成五力乃至入三解脫略說七重共意如此今疏從略但標五名也○二隨釋五初釋名二初

標二一切下釋二初對通略示二初就三處論通別三初約一化二初釋二初示諸題具通別他釋經題皆以經字爲能詮教餘字並是所詮之義作此分之甚違佛旨且人法譬皆是名字豈非能詮那得一向屬所詮義經字不可一向屬教如妙經云法華經藏深固幽遠無人能到又云爲佛護念植種德本入正定聚發救一切衆生之心成就四法必得是經疏釋此四是開示悟入佛之知見知見證理名爲得經此二豈非以理爲經金光明云十方諸佛常念是經豈令諸佛但念於教此例蓋多不能備引故知諸師以

能詮所詮釋衆經題失旨之甚今家皆用通別釋題
方無所失二通則下明通別有三種今解諸經通別
二名俱是能詮俱是所詮良以通別各自具於教行
理故勿謂二名但在於教須知通別自有教名行名
理名如一別題佛說是教觀卽是行無量壽佛是理
豈非別教別行別理以此三別對於經字卽是通教
通行通理今於三中初明教通別二初正明一化通
名者頓說漸說施權開權律論之外皆名爲經故稱
通也別名者別相乃多今從三種謂人法譬單三複
三并具足一以成七別單三者單人如阿彌陀經等

單法如大般涅槃經等單譬如梵網經等複三者人
法如文殊問般若經等法譬如妙法蓮華經等人譬
如如來師子吼經等人法譬具足者如勝鬘師子吼
一乘大方便方廣經等以此七別與通合標一代佛
法二今經下別指此經本論一化言此經者以明七
別此屬單人是故言也雖屬單人而人自分能說釋
迦所說彌陀以此二人而爲別目經同一化故曰通
名據有觀字合是人法能從於所以人兼之故略不
示然分通別不同廣釋故未委悉二爲行下行通別
諸經有用一種之行而爲別名以對通名經卽通行

若論別行其數無量卒難說盡今以增數示於行人似可領會一如一行等二如二智等三如三觀等四如四念等五如五根等六如六妙等七如七覺等八如八正等九如九禪等十如十度等乃至百千萬億無量行也此等別行皆趣涅槃究竟四德略言常樂約趣涅槃別行卽通故爲行經彼釋籤中乃以因果判行通別須知其意非謂至果其行方通欲知意者據各修因名爲行別約趣一果此別卽通斯乃別時論通通時論別豈唯行爾教理亦然如以機應對教通別佛以一音演說法衆生隨類各得解各解則機

別一音則應通各解不離一音一音不妨各解如金光明玄以能詮文字爲教通以能詮所以爲教別所以卽是四悉檀也一一悉檀皆用文字一一文字不離悉檀如以名實對理通別多名不離一實一實不妨多名故三通別皆悉同時悉類樂中管色之韻約聲則通約曲則別通別二用不相妨礙三理雖下理通別名實相對名卽是門乃以四門彰一理也亦是事別而對理通良以諸經多用一事而彰於理得理別名如此經題以無量壽佛名爲別理以對通名經則通理若於一化以通別理解經題者莫若四門以

爲別理四門者有門空門雙亦門雙非門四門名通
須分四教所謂三藏教通教別教圓教四教各開有
等四門四四乃成一十六門詮於別理成十六理理
尚非一那得十六然理無礙能應諸門猶彼虛空其
體實非方圓大小以無礙故能隨彼方圓等物成
無量相從無量說即是別理體是一空名爲通理無
通不別無別不通通別合標成一題目二此約下結
五時之內一一經題皆具通別若不用此教行理判
徒分通別全無所以也然無量行會一常樂四教四
門同詮一理若專方等未堪此聞乃是預取法華之

意跨節而談於佛滅後解釋諸經不約法華寧窮一
化二更約下約一題一化經目通別二名具教等三
關涉既廣思修或難故就卽今所解經題明教行理
宛然可見此三皆別以對經字卽是三通故云任運
有通別意欲使行者卽此一題就說解教起能觀行
見真佛理三更就下約一字一題雖約而涉三名今
示一字解行證三悉得其足此復爲二初就說字兼
含釋題中說字最可顯於教行并理故引釋論所行
如所說句以示說中舍於行理如者真如也如名不
異一真覺性物我無殊三際平等契此如理方得心

口說行不異故金剛般若云云何爲人演說如如不動法華云諸法空爲座處此爲說法事相解如二物相似以爲不異理觀解如二物性一方名不異故釋經如是三藏則以傳佛所說似水傳瓶名曰文如衍教不爾通以二諦相卽爲如別則唯聞中道爲如圓以文字性離爲如三教約此方曰文如論就理觀心口理一方得說行如如不異此令說者行契如理也二佛卽下就諸字互具釋佛復本源究竟覺體非寂非照故屬法身觀字卽是清淨智慧寂而常照故屬般若無量壽是自在神通照而常寂故屬解脫今將

諸字分對三德深有所以所以者何向就一字明教行理雖約說字義具於三旣約修辯尚通前教而又未明字字具三故今特用涅槃三德對於諸字乃彰諸字性各具三非前教人所能思說良以三德性本圓融一一互具故直法身非法身法身必具般若解脫直般若非般若般若必具解脫法身直解脫非解脫解脫必具法身般若三德卽是教行理三般若是教智在說故解脫是行用從緣故法身屬理是所顯故佛字旣是法身之理卽具二德及教行也觀字旣屬般若之教亦具二德及行理也無量壽旣是解脫

之行亦具二德及理教也若不然者豈得卽一達三
卽三達一問本以一字具教行理今何得以無量壽
三字方具於三則不名爲約一字也答以題諸字對
三德釋斯是妙談貴在得意欲令行者知三德性徧
一切處一字一句一偈一品一部一經一時一化乃
至一切依正色心多亦三德少亦三德一塵三德不
小刹海三德不大故引華嚴云一中解無量等也若
得此意今之妙觀有造修分應色一相可照三身依
報一塵卽寂光土故十六觀皆照三諦其不信者則
辜吾祖立茲法矣二於一下約一字以校量三初正

校量上窮妙旨從廣至狹今校功德從少至多一字
尚詮大涅槃理況一切經豈不圓徧二故經下引經
證如金光明及諸大乘多作此說三若不下結今得
不明一字圓具三德諸經所說一句一題受持功德
無量無邊便成虛設也自非道場得入三昧發旋總
持曷能妙說自在若斯二初釋下就別廣明置通釋
別也文四初釋佛字二初正約佛名示六卽二初翻
名標示梵云佛陀華言覺者卽說教主別號稱曰釋
迦牟尼通號有十今舉第九故標佛也旣是極果卽
究竟覺起信論云覺心初起心無初相遠離微細念

故心卽常住名究竟覺此覺圓淨無所對待生佛依正鎔融總攝十方三世亘徹無外五住二死盡淨無餘無量甚深永絕思議強名妙覺此之覺義有六種卽卽者是義今釋迦文乃究竟是圓淨之覺一切凡聖無不全體皆是此覺雖全體是且述悟因果其相不同故以六種分別此是所謂理是名字是觀行是相似是分證是究竟是然若不知性染性惡所有染惡定須斷破如何可論全體是邪全體是故免於退屈六分別故免於上慢六不離卽卽不妨六六卽義成圓位可辯問所言凡聖全體卽佛爲卽自己當果

之佛爲卽釋迦已成之佛答自己當果釋迦已成二佛之體究竟不別故諸果佛爲生性佛述則俱述見則俱見故已他佛於今色心皆可辯於六卽義也又復應知六卽之義不專在佛一切假實三乘人天下至蟠蟻地獄色心皆須六卽辯其初後所謂理蟠蟻名字乃至究竟蟠蟻今釋教主故就佛辯以論十界皆理性故無非法界一一不改故名字去不唯顯佛九亦同彰至於果成十皆究竟故蟠蟻等皆明六卽二涅槃下就覺廣明六初理卽六種卽名皆是事理體不二義而事有逆順名字等五是順修事唯理性

一純逆修事此逆順事與本覺性體皆不二其逆順名自何而立以知不二事皆合理名之爲順其不知者事皆違理故名爲逆名字等五若淺若深皆知皆順若初理卽唯迷唯逆而迷逆事與其覺理未始暫爭故名卽佛所以者何良由衆生性具染惡不可變異其性圓明名之爲佛性染性惡全體起作修染修惡更無別體全修是性故得迷事無非理佛卽以此理起惑造業輪迴生死而全不知事全是理長劫用理長劫不知不由不知便非理佛以全是故名理卽佛以不知故非後五卽然理卽佛貶之極也以其全之解行證卽但有理性自爾卽也又理卽佛非於事外指理爲佛蓋言三郭理全是佛又復應知不名郭卽佛而名理卽佛者欲郭後五有修德是此之一位唯理性是也又郭卽佛其名猶通以後五人皆了三障卽是佛故釋此爲三初引諸經示卽初引大經迦葉品云衆生卽是佛何以故若離衆生不得三菩提故如來性品我者卽是如來藏義一切衆生悉有佛性卽是我義如是我義從本已來常爲無量煩惱所覆是故衆生不能得見如貧女人舍內多有真金之藏家人大小無有知者時有異人善知方便乃至卽

於其家掘出金藏又云譬如王家有大力士其人肩
間有金剛珠與餘力士搃力相撲而彼力士以頭觸
之其額上珠尋沒膚中都不自知是珠所在其處有
瘡卽命良醫欲自療治乃至時醫執鏡以照其面珠
在鏡中明了顯現等如來藏經十喻者彼經十文一
法九喻一是所喻九是能喻以所從能故云十喻一
法者經云佛告金剛慧菩薩我以佛眼觀一切衆生
貪瞋癡諸煩惱中有如來智如來眼如來身結加趺
坐儼然不動善男子一切衆生雖在諸趣煩惱身中
有如來藏常無染汙德相具足如我無異於此文後

卽舉九事以喻其法各有長行重頌一萎華佛身喻
二巖峰淳蜜喻三棟檜梗米喻四糞穢真金喻五貧
家寶藏喻六菴羅內實喻七弊衣金像喻八貧女貴
胎喻九焦模鑄像喻弊帛者經偈云譬如持金像行
詣於他國裏以穢弊物棄之在曠野天眼見之者卽
以告衆人去穢現真像一切大歡喜我天眼亦爾觀
彼衆生類惡業煩惱纏生厄備衆苦又見彼衆生無
明塵垢中如來性不動無能毀壞者土模者經偈云
譬如大冶鑄無量真金像愚者自外觀但見焦黑土
鑄師量已冷開模令質現衆穢旣已除相好劃然顯

我以佛眼觀衆生類如是煩惱淤泥中皆有如來性
闇室下復出涅槃經云如闇室中井及種種寶人亦
知有闇故不見有善方便然大明燈照之得見是人
終不生念是水及寶本無今有涅槃亦爾本自有之
非適今也大智如來以善方便然智慧燈令諸菩薩
得見涅槃今文但引闇井具寶以證理卽不取人亦
知有等文諸喻皆爾須知諸喻理兼圓別若言三郭
定覆佛性破郭方顯此猶屬別若全性成郭郭卽佛
性以不思議德郭消者則諸喻皆圓方是今文理卽
之喻故如來藏喻止觀顯別今文顯圓次淨名皆如

語尚涉通今須圓解次寶篋下卷勝志菩薩向佛說
偈已界及法界衆生界同等已界卽心法法界卽佛
法佛以法界而爲體故對衆生界卽成三法心生在
因佛法在果三無差別故云一界無別界也二此是
下就本覺明佛前引諸經雖云卽佛猶未的示覺了
之相且指三郭體全是理今示此理當處照明知名爲
本覺佛義成也此自分二初正示言此是者指上大
經衆生卽佛諸喻寶物淨名皆如寶篋法界此等皆
是本性圓智非三般若融卽微妙智不名圓知一切
法一一含受一切諸法全法是智全智是法待對斯

絕名圓覺諸法諸法乃是生佛依正三際十方此等時處既全是智何有一處一物一塵體不明了然此明了非心意識所能及也故起信論本覺義云心體離念無所不徧等虛空界本性明了既其離念安以情求所謂不思議智照等也勿認六道漏心三乘證智而爲本覺明了之相妙覺之覺方是理佛全修在性斯之謂歟一雖五下遮情情執者云諸有業縛無明惑暗那言衆生卽是佛邪故遮之曰雖業至無間而皆當體是三解脫雖見思昏倒而本覺未始不存惑業全是性德緣了佛性豈可更壞理佛刀不自傷

故二斯下對四事辯理世間常住者卽十法界三十世間一一皆住真如法位法位常故世相亦常然世本代謝而言常者以一切法卽真實性性不改故故名爲常若謂遷流不得言常斯謂情見良以生法卽性故常住異滅法卽性故常卽性之常非常無常不可思議言偏意圓故可得云一生一滅無非中道唯生唯住唯異唯滅法華述門顯所證云世間相常住於道場知已本門乃云如來如實知見三界之相非如非異故知世間卽是三界常住豈乖非如非異本迹雖殊不思議一也此理祕妙佛能明見故故云灼

然今我智者成祕妙觀雖是肉眼而名佛眼能見祕
藏亦云灼然故妙樂云顯露彰灼稱爲真祕真祕之
理卽世相當世相當故衆生卽佛此理妙故有佛教
化不益一毫空過無佛不損一毫五卽得之何足爲
高理卽失之未始暫下對此四事示理佛也二如斯
下名字卽此至究竟皆修德也須論損益及以高下
言名字卽佛者修德之始聞前理性能詮名也然有
收簡收則耳歷法音不門明昧異全不聞俱在此位
簡則未得圓聞齊別內凡尚屬理卽以七方便未解
妙名豈知卽佛此自分二初帶喻示名字二初不聞

之失理雖是佛全體在逃佛出不聞經名絕聽此乃
却指但理之失也二若佛下聞名之得六卽辯佛故
今名字唯約三寶及十號也無明長夜佛出令曉闡
本智日乃識三寶照世光明生死巨闊無佛長鎖佛
能於此開甘露門令知十號是常住味此光此味乃
從衆生心性流出還使衆生解此光味卽本性佛因
說等者却指貧女含寶喻也初旣不知家有寶藏唯
受貧苦因示得知寶雖未掘預生適悅此等法喻皆
示於名有識知義能知所知卽名字佛二故須下引
人明卽佛梵云須達多此云善施亦曰給孤獨涅槃

二十七云舍衛有長者名須達多爲兒婢婦詣王舍城宿珊瑚那舍見彼長者中夜而起莊嚴舍宅乃問當請摩伽陀王耶答云請佛須達初聞身毛皆豎復問今在何處答曰在迦蘭陀精舍須達思念欲見于時忽見光明如晝尋道而出城門自開見佛聞法證須陀洹疏云巨闕卽城門也今明毛豎卽驚覺也聞名生覺卽本性佛若論大經追叙昔事方證初果驗聞名時未能解了覺卽本性及前科中三寶十號亦涉於小今約跨節取意而談五時示現身相名號說法度人乃至聞者一念微解一一皆是全性起修當

處無非本性佛法如前一化增數諸行皆會圓常四
教四門唯詮一理不從跨節焉消彼文況文出涅槃
部已開會故約驚覺示名字佛

觀無量壽佛經疏妙宗鈔卷第

浙江嘉興府楞嚴寺般若堂本年貲刊此
妙宗鈔一卷計字一萬六百四十八
該銀六兩一錢二分
康熙元年月

觀無量壽佛經疏妙宗鈔卷第二

宋四明沙門知禮述

三觀行卽此中觀法異常坐等直觀心性故託他佛而爲所緣然是大乘知心作佛佛卽是心其觀未成爲塵所動始自圓聞觀佛妙境至識次位勤行五悔若未發品此等行人皆屬名字故知名字其位甚長今明對塵卽成佛觀其中念念覺知之心名觀行佛此自分二初觀妙色卽真法以大小相皆悉周徧故此色身卽是真法又二初約一佛二初示始習卽心觀相此是名字昇進之位不獨解名能修觀故但未

入品非觀行位觀佛相者若此經中八萬相好非羸劣想而可繫緣故須初心先觀落日漸觀地樹及以座像觀既深著方觀勝身今依般舟初心先觀千輻輪相次第逆想至肉髻三十二種是下品相復從足起可作始行繫心之境不須更以落日爲緣若相好皆依於身身唯金色故云如鑄金像此之色相雖從心想如在目前故云與眼作對言妙色者卽是不可思議色也所以者何由此行人已圓聞故知色唯心知心唯色五根所對尚體唯心況想成色豈在心外此色非色非色而非色而能雙照色與非色旣離

情想故名妙色非由三觀莫見妙色非由妙色莫成三觀境觀相資塵念靡間方能得入觀行位也二開眼下明觀成稱性周徧妙心作相妙相發心心不休成觀入品塵緣莫動佛常現前閉目了然開眼不失在明見佛處暗不忘性無間然佛豈暫闕一一相海莊嚴法身相爲大相好爲小相觀大發小名爲流出劫水雖大止劑二禪佛相徧周稱於法界且以分喻顯於周徧觀行佛眼名曰周眸此眼所觀何處非佛問金光明玄義觀於三道顯金光明似位尚云閉目則見開目則失今觀三身位在觀行因何開閉俱

得見邪答彼明性德金光明理此理初住方任運見故於似位猶論得失今帶事定託彼應色觀於三身以其應相凡心可見故理三身雖乃未顯不妨應色先與定合故令開閉皆見佛身如以三觀觀彼落日三觀未成而能開閉皆見於日故雖事理一念同修而理難事易事易故先現理難故後發故般舟三昧以三十二相爲事境以卽空假中爲理觀境觀雖乃同時而修境必先成託境進觀藉觀顯境更進更顯從凡入聖故知彼就趣真無住對似愛頂墮爲開閉得失此就應色得成觀行爲開閉俱見不知事理難

易深此相違文何能銷釋二念一下等諸佛二初約一佛等諸佛爲成觀故不可散緣故以彌陀一佛爲境雖觀一佛何異十方雖照現今何殊過未此彰一切不離彌陀良以彌陀是無量之一故能等於一中無量二一身下明諸佛同三法一佛等彼一切佛者以由佛佛同得三法身是法身智慧是般若力四無所畏是解脫亦是三身三涅槃等身智言一者顯於諸佛法報不別應用亦同故力無畏結云亦然同身智一也菩薩因中分破無明分同妙覺所證三法無明破盡則究竟同諸佛三法諸佛三法旣其不

二是故彌陀三法不少一切諸佛三法不多故言等也二念色下念三身以結示色是應身通於勝劣及其他受用法門是報身以諸法門聚而爲身卽八萬四千陀羅尼爲髮第一義諦爲髻種智爲頭慈悲爲眼無漏爲鼻四辯爲口四十不共爲齒二智爲手如來藏爲腹三三昧爲腰定慧爲足等此諸法門若從所證名爲法身今從能證名爲報身自受用也實相是法身非不具於一切法門及諸色相讓於能證及垂應故今是所證及以能垂但名實相前論觀法文中但言相好周徧次文乃約三法論等至今結示云念

三身應知法門及以實相不離色身舉一卽三全二是一法爾相卽非縱非橫是故此經第九佛觀經不相好疏名真法不知圓觀此名莫消若觀佛身不涉後一便同小外何預妙宗須知此文是結前觀色相周徧已具三身二常運下明卽佛觀行位人一切時處念佛三觀常得現前故云無不念時言念念皆覺者不卽佛義雖是始覺卽同本覺非全本覺觀不名中亦得義論始本一合雖非究竟及真似今而亦得是觀行合也若論卽字廣雅訓合荆谿云依訓乃成二物相合於理猶疏今以義求其體不二方名爲卽

然其始覺與本覺合雖名爲合非二物合正是荆谿體不二義良以始本覺體是一故知六卽得名六合理卽乃以逆修之覺與本覺合五皆順覺與本覺合六合無非體不二也荆谿有時亦以合名明不二體故不二門云復由緣了與性一合方能稱性施設萬端緣了是始性豈非本修性體一復名爲合四相似卽今旣釋佛乃似本覺良以此位始覺之功尚伏無明全未破故非真本覺唯得名爲相似卽佛若四十一位分破無明故得分分是真本覺名分真佛至極果位無明旣盡本覺全彰故得名爲究竟是佛卽究竟

竟本覺亦究竟始覺亦是究竟始本一合亦是究竟始本俱忘例前五卽皆有四義問名字等五以始對本論合及忘四義稍可唯初理卽旣全在迷豈有始覺及二義邪答理雖全迷而具三因及五佛性緣了二性豈非本有修因始覺果及果果二種佛性豈非理中究竟始覺理若不具此等始覺名字等五便須別修復何得云全修在性但有卽名無卽義也自非山教圓位徒施今當相似位中四義文自分二初標釋二初約三身明卽佛前觀行位常用三觀念佛三身觀覺雖成似覺未發加功不已今本覺三身相似

而發與始覺三觀相似相應應是合義合而不忘非妙覺也問於一本覺約何要義顯示三身令人可見答本覺諸法卽空假中覺諸法假卽相好身覺諸法空卽法門身覺諸法中卽實相身如此論之其義宛爾更於一覺約寂照說照而常寂自在神通卽相好身寂而常照清淨智慧卽法門身非寂非照而寂而照卽實相身此之二三皆非縱橫不可思議乃是寂覺照覺雙遮照覺全本成始卽是相應及俱忘義此位三身卽佛義顯是故文中不特言覺示於卽佛二相似下約四喻明相似行人本覺寂照及雙相似而

發成相似位三種之覺此覺似真若鑰若瓜比金比瓠此之二物喻始似本如將至火先覺暖氣行欲近海預覩平相此之二事喻於相似近乎分真前二約法論似後二約位論似二水性下勸證二初約事勸本覺清涼其猶冷水似覺飲之知消煩熱名字之人如熱渴者須三觀功掘無明地方得真似清涼之水徒聞此水不施觀功又無事行取水具物守渴而終至極熱處二略舉下引文證相似相應功德之相如彼法華六根清淨文雖稍廣其相顯然行者易知故得名要六根同有五種似發所謂肉眼天眼慧眼法

眼佛眼肉耳天耳慧法佛耳乃至意根亦有五相此
之六五卽三相應肉天法六卽相好身相似相應慧
六佛六卽法門實相相似相應以五眼等是不次第
相似發故可以對於圓三身也行者能於三觀觀佛
六根三德不久相應五分證卽卽心觀佛託境顯性
雖得相似尚屬緣修今則親證屬於真修分破無明
起信論中稱隨分覺寂照雙融本覺真佛分分而顯
從所顯說名爲分真從能顯言名爲分證四十一位
皆受此名自分二初明初住一代教中圓位顯者唯
起信論及華嚴經經說三身初住頓得論明八相初

住能垂若此位不論破無明惑安得如此上冥下應
故知十向方伏無明初住但能斷於見惑此等經論
是漸次教不可與其華嚴起信頓修頓證菩薩一概
是故今立詮中道教論次不次分於別圓今就彼經
明分證佛此文分二初約發心明卽佛二初約三法
明發就初住名示卽佛相位名發心發本覺心也常
寂常照寂照雙融是本圓覺卽一而三不發而發故
成三發皆言一切者法界無外攝法不遺諸佛衆生
色心依正同一覺體全體爲緣全體爲了全體爲正
緣因發故了正亦發了因發故緣正亦發正因發故

緣了亦發蓋三法圓融發則俱發緣發名功德能資成故了發名智慧能觀照故正發名境界是真性故是所顯故問三德既是一本覺性由證顯發今云一是所顯境界二名能顯功德智慧若是能顯二則是修何得名證本覺三德答其理如是方不思議所以者何三雖性具緣了是修二雖是修非適今有二若非修三法則橫二若非性三法則縱故釋籤明三點不縱橫云雖一點在上不同點水之縱三德亦爾雖法身本有不同別教爲惑所覆雖二點在下不同烈火之橫三德亦爾雖二德修成不同別人理體具足

而不相收文畢輒出其意別教法身爲惑覆者良由不知本覺之性具染惡德是故染惡非二德也故別惑通惑業識事識煩惱結業三乘六道變易分段此等一切迷中二法非二佛性旣非佛性乃成定有能覆之惑是故但有法身本覺隨於染緣作上一切迷中之法以是名曰爲惑所覆應知覆義不同泥土覆彼頑石旣覆但中佛性之理如淳善人一切惡事非本所能爲惡人逼令作衆惡故說善人爲惡所覆應須還用隨染覺性別緣真諦及以俗中次第別修空假緣了或中邊緣了種種二因或初緣次了或初了次

緣次第翻破一切迷法顯於法身本覺之性是故覆理成於縱義圓人不爾以知本覺具染惡性體染惡修卽二佛性故通別惑事業識等一切迷法當處即是緣了佛性豈有佛性更覆佛性如君子不器善惡俱能或同惡人作諸惡事則彰已能何覆之有故卽二迷以爲緣了顯發於正緣了二德體迷而得義當所發元是修德復當能顯雖分修性皆本具故義不成縱言別人理體具足而不相收者亦爲不知本覺之性具染惡德不能全性起染惡修乃成理體橫具三法言不相收者以其三法定俱在性皆是所發猶

如三人各稱帝王何能相攝是故不知性中三法二是修者二乃成橫圓人不然元知本覺具染惡性故使迷中一切染惡當處即是緣了佛性以此二修顯於一性如一主二臣主攝於臣臣歸於主三德相收亦復如是今初住位所發三法皆性具故發則俱發故云不前不後以此三法二爲能顯一是所顯修性宛爾故云亦不一時不一時故非橫不前後故非縱不縱不橫不思議發是故名爲初發心住二三智下約三身明佛前以正助二修對性明圓發相今約報智證法起應報應二修對法一性論分證佛從智證

法從法起應卽非一時三身頓得故非前後不縱不橫復見於此從始圓修一心三觀今圓三智一心中得卽以此智證得法身智性卽色三一體融名妙色身此身湛寂如鑑無情形對像生山毫靡間名應一切三身三德體離縱橫今始發明名開祕藏入理般若名爲住此住無住住秘藏中二以普下約被物明佛用二初總示三輪色像卽身輪一音卽口輪等悅卽意輪身名神通輪口名正教輪意名記心輪妙觀察智也輪者轉義亦能摧碾已心證法轉入他心能摧碾他一切業惑此三業應有十界相皆是初住分

得佛用二應以下別示十界上明能用種種三業不出十界今分別之先明佛三況出九界佛應三王且說同居化有始終須彰八相大機所見八相難思若應小乘八種皆劣大示出沒如水之波全法界身八皆勝妙小乘生滅體是無常如火燒薪終歸灰斷故兩八相不分而分勝劣宛爾此等皆是果人法則名佛威儀初住能爲名之曰具威儀屬身音聲屬口方便是意應以佛界而得度者卽爲現此三輪相也佛相至高尚能跡示以佛況九現之不難旣現九界各具三業然非直現十界而已於一一身復現十界重

重無盡以得普現諸身三昧故也二初住下況後位
初住始破一品無明分證三身垂形十界其相尚爾
況二三住況第十住行向登地至于等覺破惑轉深
德用轉廣寧以心口而思說邪良由位位始覺本覺
一合俱忘致使體用高廣若此六究竟卽一切諸法
無不是佛迷故不知故圓實教不順迷情直示一切
皆是佛法世間相常衆生是佛不稟教者但有理是
全不知是若聞此教於名知是若入五品於觀知是
入十信者相似知是四十一位分真知是今登極果
究竟證知一切諸法皆是佛法此自分二初據位直

明等覺已名滿足方便地菩薩究竟地始覺道窮本
覺理極本始旣泯無以名焉強稱妙覺大品般若四
十二字字字互具諸字功德南嶽用對圓頓教中四
十二位初住阿字中四十字對至等覺最後茶字當
於妙覺雖一位皆能徧具諸位功德然是分具今
此極位乃究竟具諸位功德故引法華唯我釋迦與
一切佛乃能究竟諸法之權實相之實達無明底到
諸法邊名邊際智不思議權智也今已究竟故名爲
爲頓圓復用第七無上士號顯智斷極有惑可斷名

有上士等覺位也無惑可斷名無上士卽是妙覺斷德究竟名大涅槃更有過者名有上士亦等覺也更無過者名無上士卽是妙覺智德究竟名大菩提二約喻稱歎用彼大經月愛之喻十五日月對四十二圓因果位皆智光增惑暗減滅故初之三日對住行向三十位也從初四日至十三日對十地位十四日以對等覺十五日對妙覺位此乃合前三十開後十地若三十三天同服甘露對四十二位皆證常理開前三十位對三十天合後十地用對一天等覺對一妙覺極位次對釋天若四十二字字字互具四十一

字對於圓證四十二位位位相收則前後俱開若開示悟入佛之知見對圓真因四十位者前後俱合也今十五日月光既滿卽智德圓暗無不盡卽斷德極故大師云此之增減日日有之此之智斷位位有之故不更用後十五日邪光減也復以衆星對諸因人月喻果佛最上等言皆是稱歎究竟佛也二佛有下以例諸號明難說圓極之果所有名字一一不虛究竟成就蓋其所召皆真極故以望真因尚帶虛設妄未盡故七種方便一切凡夫悉是虛名一無實義故大經云世諦但有名無實義第一義諦有名有實義

佛是究竟第一義故又復應知非別有法名爲究竟
第一義諦毗盧遮那徧一切處一切諸法皆是佛法
是則世間及出世間二死五住至鞞荔多蠶動蜎
五無間等若因若果無非圓極第一義諦故此諸名
皆實不虛悉是究竟佛之異名是故稱爲佛有無量
德應有無量名今唯舉佛一名當之故諸大乘明於
佛號或增或減皆是四悉赴彼物機今於通號十名
之中舉第九佛也淨名經云正徧知如來及佛此三
句義大千衆生皆如阿難多聞第一以劫之壽不能
盡受隨其宜樂舉此三名以少況多功德無盡二釋

說字二初牒釋悅是暢悅懷是心懷若就此經卽是
如來久修久證念佛三昧蘊之在懷今機扣發說之
乃暢昔之所懷二卽十下示相據今之說正在念佛
次文委示今不預陳故且通塗明其說相文二初明
所說法相十二部經總明說相謂或作長行說或作
重頌說或作未曾有說或作無問自說說等若八萬
法藏乃具示所說種種法門合云四千且舉大數然
應了知有多八萬且約四諦示諸八萬若言八萬法
藏卽苦諦八萬塵勞卽集諦八萬對治門八萬三昧
門八萬陀羅尼皆道諦八萬波羅密卽滅諦今雖示

一義以兼三以法藏名是蘊聚義判屬苦諦復由蘊義兼得三諦蓋四名言不離陰故如俱舍云牟尼說法蘊數有八千彼體語或名是色行蘊攝故十二八萬俱通小衍或云小乘唯有九部大則十二或云小有十二大唯九部或云大小皆有十二六度四等雖在大乘亦通三藏事度菩薩然其名數四教皆同須就所詮真中二理定其權實復論四種能趣觀行用簡偏圓使寶渚化城迂直不濫二又於下明能說善巧二初於一法一門明四悉上之所列八萬等法既通四教即是生滅八萬無生八萬無量八萬無作

八萬如生滅八萬趣舉一法須開四門四門假人同皆叵得若其實法四義不同約有門說念念無常如燈焰焰約空門說三假浮虛猶如雲霧雙亦門說二相從容雙非門說二相俱捨四中一門機生熟故四悉被之爲未種者作世界說令其樂欲讚用受行爲已種者用中二悉善根未發作爲人說令起宿善信戒進念惡未破者必對治說令其三毒豁爾冰消爲已熟者第一義說令得契真革凡成聖佛智鑒機說之必中知不入理令得三益知不破惡令得二益無善可發作世界說但生歡喜若全無益佛則不說二

若一下例諸法諸門示四悉上明一門被機四悉餘之三門被機亦爾八萬中一四門四悉被機既爾其餘諸法四門四悉被機亦然一教八萬門悉既然三教亦爾八萬法藏例於塵勞及對治門三昧總持波羅蜜等一一八萬法法四教教四門門門四悉其十二部六度四等準此可知以此略明佛說之相三釋觀字卽所說也上十二部八萬等法豈非所說然此泛舉顯於能說下無量壽及今觀字的是此經所說義也釋觀分二初牒釋雙標牒起觀字以觀釋之乃用觀法觀於勝境若非觀法將何觀之撮經所詮

立茲題目經明十六以爲能觀今釋題名唯論三觀經文是別題是總名總總於別別於總若也立題收文不盡則不能應篇章之式故知今立三觀釋觀乃是經文十六觀體若就十六各各示於三觀相者其文繁廣故於釋題總而不之令其修者以茲觀法入十六門則境境皆三心心絕妙四依被物言簡意周雙標次第及以一心二三觀者此乃以次顯於其次不融別觀無以明圓如止觀中皆用思議顯不思議二從假下據敎雙釋二初次第三觀二初列名指經所列諸名釋中自見二今釋下釋相結果依前列

名釋三觀相第一空觀而有二名假是等者見思取
境無而謂有虛假凡俗知虛名諦二空之理是審實
法知實名諦不究俗虛莫知真實要須照假方得入
空是故名曰從假入空又假是等者迷世俗時謂虛
是實則二俱不諦若悟俗虛必知真實則二俱諦故
復得名二諦觀也此觀等者修觀名因證智名果釋
論三智爲易解故分屬三人故以聲聞對一切智卽
空觀果當於別敎十住位也第二假觀亦有二名先
斥住空墮二乘地若修假觀能成佛法能益衆生觀
空欲作入中方便故於空智證而不住三界惑著須

蕩令空諸法因緣須究本末見思重數如塵若沙以
大悲心偏觀偏學名爲知病諸法諸門破性破相一
對治無不諳練是名識藥隨惑淺深知機生熟神
通駭動智辯宣揚四悉當宜各令獲益如此授藥方
肯服行皆由證空能入此假故此觀名從空入假而
言等者前除見愛破假用空今遣塵沙破空用假於
空於假各一破用前後相望至今均等故復名爲平
等觀也此觀等者若依釋論以菩薩人對道種智卽
假觀果位在十行二空下第三中觀初雙標初觀空
生死者別人初心信今知覺本是常住中道佛性從

教道故名爲但中唯善唯淨不具染惡雖無染惡其性靈知強覺忽生境界斯現分別境相執著我人不昧之知邪思邪見現前染惡既非性具皆是隨緣變造而有是變造故非性本然是故見思不卽中道定須破故卽義不成故不得云唯愛唯見唯色唯香設欲修中能所不絕故修空爲正中觀爲傍何者心旣著有須別緣空破茲愛見所觀之空是一乘法旣非性具乃是別修空非畢竟是故空觀但空生死次觀空涅槃者生死之有雖已破除心又著空須別緣假破此空著假是建立是菩薩法非性具故亦是別修

能蕩空著名空涅槃此之等者前空生死見思惑忘次空涅槃塵沙惑盡二惑旣盡心無偏著是故得爲雙遮方便初觀等者復因次第用於二觀觀其二諦是故得爲雙照方便方便立已圓觀可修於十向中卽以所顯中道佛性而爲能觀中道之觀諦觀不二惑智一如三觀圓融是無作行故得自然入薩婆若此觀之果名一切種智位在初地二一心三觀斯乃稱性而觀絕待而照蓋一切法性是法身般若解脫如伊字三點三非孤立一一圓具舉一卽三乃以三德而爲三諦般若是真解脫是俗法身是中德旣不

縱不橫諦乃絕思絕議此是佛之所諦今以此諦而爲所觀諦既卽一而三觀豈前後而照故依妙諦以立觀門卽於一心而修三觀此觀觀法能所雙絕況無量壽佛本修此觀成就三身法報泯然真應融卽非茲妙觀寧顯妙身化主若斯徒衆亦爾正報旣妙依報豈麤故十六境皆須妙觀此文爲三初依智論釋二初釋相二初約法釋三智卽前次第所明一切智道種智一切種智令易解故分屬三人剋性圓論三智實在一心中得三智是果三觀是因果在一心因豈前後因果不二方曰圓修故舉智後卽明三觀

一觀而三觀者趣舉一觀卽具三觀舉一空觀假中亦空三觀悉能蕩相著故舉一假觀中空亦假三觀皆有立法義故舉一中觀空假亦中三觀當處皆絕待故若知三觀只在一心則一一觀任運具三也觀於一諦而三諦者諦觀名別其體不殊全諦發觀觀還照諦旣無別體以何義故立諦立觀若欲分別就三因說性三爲諦修三爲觀性了是真性緣是俗正是中諦不是了因非大真諦俗中亦然此之三諦方與三觀體性不殊頑空爲真與觀體別俗中亦爾三觀互具者蓋性三本融全性成修此之謂矣二類

如下引類釋以有爲法類無爲性一利那心初生卽減兩間名住不無三相而在一心三相無常尚居促念三觀稱性無作無生具於一心其義何爽二此觀下結果不明智果觀法無歸故示觀成惑滅理顯豁然妙證三種智慧實在一心或具論三智或從勝說只但名爲一切種智寂滅等者論自解釋一切種智雙寂二邊無明之相雙照二諦種種行類始自初心圓修三觀妙觀中道念念雙忘而卽二邊念念雙照一心三觀法爾如然今入分真本智顯發全由始行亡照之功二引中論證論云因緣所生法我說卽是

空亦名爲假名亦名中道義論通行三今證圓觀觀所對法豈有不從因緣生者今修圓觀必先解知能生因緣及所生法皆不思議方於此境觀空假中又須了知妙諦妙觀悉是能觀因緣所生陰等諸境皆是所觀前且直云觀於一諦而三諦須知於陰等境觀一諦等也勿守略文須尋觀義又不可謂先解所觀不思議故便不得言陰及無明何者本說因緣及所生法是不思議若非無明何名因緣若非陰等何名所生有人見釋心法妙云心法在因約迷以說佛法在果約悟以說輒便難云心法稱妙何得是逃良

由此人不知所以解逃是妙方曰圓人如論苦集稱爲無作及十二因緣名不思議豈不得云不思議無明人雖解妙法體是逃不知理卽一向在逃妙覺一向屬解中間四位逃解共俱名字卽人若不觀逃何處用觀等覺之位若不破逃寧登妙覺以上上智斷下下惑惑非逃邪人之多僻其類實繁釋論三智已如前釋三此觀下約妙結示初一句總歎微妙次二句約三一歎妙一不定一一卽是三三不定三三卽是一釋論以不決定解不可思議次三句對十六歎妙上明一三融卽總一妙觀也卽此一觀徧入諸門

名一觀一切觀雖入諸門只一妙觀名一切觀一觀觀若定一莫入多門觀若定多不可爲一實不可以多思議故云非一非一切後二句結示雖非一年多攝一切是故十六無非妙觀四釋無量壽正示三觀所觀境也前明三觀且以三德及以三因而爲諦境蓋示所觀融卽用顯能觀絕妙須知性中三德體是諸佛三身卽此三德三身爲我一心三觀若不然者則觀外有佛境不卽心何名圓宗絕待之觀亦阿彌陀三身以爲法身我之三觀以爲般若觀成見佛卽是解脫舉一具三如新伊字觀佛旣爾觀諸依正

理非異塗此意不明非今觀佛釋此爲二初牒名從梵無量壽者已是華言天竺梵語稱阿彌陀二佛本下從真出俗二初約本無三標無量壽乃是無量而爲其量是則題中已言壽量壽量依身乃成三義故約三義而論有無所言佛者究竟覺也理智既極始本兩忘無相無名不可說示寧得立其身及壽量二隨順下隨世俱立二初列三身各三據究竟覺第一義諦則不可言身及壽量爲度生故乃順世間立名立相故說三身及三壽量是則真佛無三隨世故有然須了知有無之意言佛本無身無壽量者但無有

相隨情之三非無性具微妙身等是故真佛究竟一切淨穢法門若一向無何異小乘所詮真理故真無俗有真有俗無皆是悉檀不可偏執今文意者蓋立三身釋無量壽恐執定有是故先言佛本無三隨世說有得此意已分別三身三壽三量則無滯也二法身下釋三身三義二初約義分別二據理融卽以有次文盡理融卽故今且約修二性一塗分別初自爲三初法身二初別釋三初法身者師軌釋法捨通從別通則生佛俱軌法性然其九界雖軌而違如人依師不順師教唯有諸佛從初發心軌法而修今能

究竟冥合法性故大經云諸佛所師所謂法也以法常故諸佛亦常順法性故名法爲師實非所師與能體別故卽所師法而爲其身雖名爲身已出五陰故非色質及非心智色是初陰心智卽四陰旣其非陰亦非入界故非三科任持攝屬此則已簡分段變易以示生死陰等攝故亦可色質簡應心智簡報三科簡因旣非此等何以狀名爲物機故強指法性名爲法身二法性下壽連持之壽親依命根今法性壽非識息煖報得命根亦非三事連持之壽爲物顯德乃指法性非八相遷非九世易強名爲壽三此壽下量

壽之分量合論長短及以延促今法性壽實無此等分量之相此則通簡若別簡者長是報佛短是衆生能延能促卽是應身非此等量爲成觀故強指法壽同虛空量此卽下總不法性三義非陰聚身非報得壽非長短量不可思議強於法性說身說壽說量故也二報身二初稱法有報二初引經報卽酬報也修行是因感於妙報而酬因也法華證智德經云慧光照無量久修業所得大般涅槃證斷德也此二果德酬答修因是故名報二如如下釋相感報之時其相何似故以一法二喻顯之如名不異所觀差別不

名如境智外有境不名如智各二如者境如如智智
如如境此之境智故得應冥智慧名通故以果覺菩
提簡之即是無上菩提之智與法性境相應相冥先
舉函蓋喻其相應恐謂函蓋雖際畔相當終存兩相
故重舉水乳以喻相冥令知始本同是覺性其體泯
然正同水乳則顯境外無智智外無境水乳可見二
法身下於報立三卽身壽量也三中一一言法身者
報智所冥離法無報故初身言非身者非應佛有分
齊身非不身者非報佛無分齊身又非身則非有非
不身則非空中道法身乃本覺體始覺冥此能冥亦

忘爲成觀故強名報智二法壽下明壽言非壽者非
應同連持之壽非不壽者非報智不連持壽雙非二
邊冥中法體強名之意同前身也三法量下明量非
應有量非報無量及非二邊義同身壽三應身三初
明應物有三初身如谷答響大小隨聲如鑑現形端
醜在質應萬物感現勝劣身二應同下壽身旣同物
壽豈差機三應同下量隨宜長短示量無量二智與
下明依二有應三初法智卽報身體卽法身此二冥
合應用無方二如水下喻真金上色須水銀和方能
全物闕此一緣金無塗用三功德下合報智功德契

會法身隨有機處應無不往三能爲下明應徧三土
二初雙明報應二有量下單示應身初義者上所說
報但論冥法卽自受用也今明垂應以他受用常住
之應對於生身無常之應示二述用是故雙明身等
身卽生身有分齊相故名爲身非身是報無分齊相
故曰非身小般若云佛說非身是名大身大身者乃
他受用身也無分齊身其壽則常故無量也有分齊
身壽則無常故有量也此二應用乃依真中二理而
住機依事業二識而見住理廣如金光疏說二識委
在起信論明論意要在事識見則取色分齊故名應

佛業識見則離分齊相故是報身此義至後釋觀佛
觀鈔中辯之行者須知常身無量通應三土無常有
量但應同居所以者何蓋實報機分證論見他受用
身方便土人唯稟別圓所見佛相雖小優降然匪生
身悉是報佛若同居土具四教機稟別圓者能覩報
佛故法華明常在靈山華嚴說法盡未來際及諸大
乘卽於應相見是法性尊特之身故知常身徧應三
土若無常身唯應同居逗藏通機生凡夫善也次義
分二初明有量二義上之所說自受用外垂三土身
皆名爲應其他受用雖就對機名之爲應而是實因

之所感剋復名爲報非是差別逗機之用若論逐物隨緣參差長短身壽量者須就同居無常用說故今別示應身之相但於有量開出兩量而此兩量依於事識但空見故唯屬無常若依業識不空見者卽此無常全體是常則常無常二用相卽二鳥雙遊也若上二土機息應轉亦是無常以非八相故且言常言七百等者首楞嚴三昧經云堅首菩薩問佛壽幾何佛令往東方過三萬二千佛土於莊嚴國問照明莊嚴自在王佛彼佛答云如釋迦壽我亦如是汝欲知者我壽七百阿僧祇劫堅首迴此白佛阿難云彼佛

乃是釋迦異名雖機勝見長而七百猶可數故亦是有量之量若阿彌陀人天莫數故是有量之無量也二應佛下結應佛皆然佛佛旣皆三身圓證應身被物物壽長短豈不隨順各示兩量故彌陀現長亦能現短釋迦現短亦能現長故大論第三十六云當知釋迦文佛更有清淨國土如阿彌陀佛國阿彌陀佛亦有不嚴淨國如釋迦文佛國又第三十八云此間閻浮惡故釋迦壽應短餘處好故佛壽應長故涅槃二十二云西方去此三十二河沙有無勝國所有莊嚴如安樂世界我於彼土出現於世斯皆隨逐物機

也二然下據理融卽上辯三身法是本有報約修成
應論現往其言似縱須知報應二種之修性德本具
雖是性德修相宛然全性起修全修在性三一冥泯
思說莫窮不可等者如上豎論顯非並一若言性具
三身壽量顯非別異若作並別一異之解卽乖所詮
圓常法體卽一而三故不橫卽三而一故不縱非縱
非橫不可思議如此解者乃會能詮玄妙之文也

觀無量壽佛經疏妙宗鈔卷第二

音釋

掘

渠勿切穿地也

籤

七

廉

摧

碾

摧

昨

回

挫

也

鞞

鞞

符

鞞符

鞞符

鞞符

鞞符

鞞符

鞞符

荔

郎

諳

練

諸烏合

悉

也

練

分

齊

分

符

問

齊

限

量

量

量

量

量

量

浙江嘉興府楞嚴寺般若堂本年貰刻此

妙宗鈔計字一萬四百七十該銀六兩三分

康熙元年月



集解卷之二
平民
一
萬四百五十
萬人
萬人
萬人
萬人

指掌言
事請息今以私也
不
不
不
不
不
不

不
不
不
不
不
不

ノ
十一